

Bosna i Hercegovina  
Federacija Bosne i Hercegovine  
KANTON SARAJEVO  
MINISTARSTVO UNUTRAŠNJIH POSLOVA  
UPRAVA POLICIJE  
SARAJEVO

Broj: 02- 180 /18  
Dana: 11.07.2018. godine

**SKUPŠTINA KANTONA SARAJEVO**  
**NEZAVISNI ODBOR**  
N/r predsjednika

**PREDMET: Izvještaj o radu policijskog komesara za period  
april-juni 2018. godine, dostavlja se.-**

Poštovani,

na osnovu odredbi člana 45. stav (2) Zakona o unutrašnjim poslovima Kantona Sarajevo, u prilogu akta dostavljam Vam na upoznavanje i nadležno postupanje Izvještaj o radu policijskog komesara za period april - juni 2018. godine.

PRILOZI: Kao u tekstu.-

**POLICIJSKI KOMESAR**  
**Generalni inspektor policije**

**Mevludin Halilović**

OTPREMLJENO  
Broj: 180 / 18  
Datum: 11.07.18

# IZVJEŠTAJ

## O RADU POLICIJSKOG KOMESARA ZA PERIOD APRIL-JUNI

2018. GODINE

Kao rukovodilac Uprave policije u Ministarstvu unutrašnjih poslova Kantona Sarajevo (u daljnjem tekstu: Uprava policije), u vremenskom periodu april - juni 2018. godine, u skladu s ovlaštenjima datim odredbama člana 23. Zakona o unutrašnjim poslovima Kantona Sarajevo ("Službene novine Kantona Sarajevo", broj 1/16, u daljnjem tekstu: Zakon), kao i odredbama drugih relevantnih zakonskih i podzakonskih propisa, te Planom aktivnosti policijskog komesara u cilju unaprjeđenja rada Uprave policije u vremenskom periodu 2017. - 2021. godina, preduzimao sam poslove i zadatke u cilju efikasnog rukovođenja Upravom policije u izvršavanju poslova i zadataka propisanih u članu 20. Zakona u cilju osiguranja što većeg nivoa lične i imovinske sigurnosti na području Kantona Sarajevo.

Tokom izvještajnog perioda preduzeo sam slijedeće mjere i radnje:

I Predstavljao sam Upravu policije neposrednim učešćem i radnim angažmanom kroz različite oblike komunikacije s vladinim agencijama i nevladinim organizacijama, međunarodnim organizacijama i predstavništvima, a sve s ciljem stvaranja povoljnije sigurnosne situacije na području Kantona Sarajevo, stručne edukacije policijskih službenika Uprave policije, efikasnije i bolje realizacije naloženih vještačenja, bolje suradnje s policijskim agencijama u BiH i pravosudnim organima, prvenstveno Kantonalnim tužilaštvom Kantona Sarajevo.

Radi osiguranja što bolje suradnje, pripreme i realizacije projekata koji se zajednički provode na području Kantona Sarajevo u cilju izgradnje što boljeg razumijevanja i suradnje s lokalnom zajednicom, kao i stručne edukacije policijskih službenika Uprave policije na međunarodnom nivou i podizanja sigurnosti uposlenika diplomatsko-konzularnih predstavništava u BiH sa sjedištem na području Kantona Sarajevo, prisustvovao sam slijedećim sastancima: dana 11.06.2018. godine s predstavnicima ICITAP-a u BiH, dana 25.04. i 10.07.2018. godine s predstavnicima EUFOR-a u BiH, dana 10.05. i 28.05.2018. godine s predstavnicima OHR-a BiH, dana 25.05.2018. godine s predstavnicima Visokog sudskog i tužilačkog vijeća BiH, dana 03.04.2018. godine s predstavnicima BH Pošte, dana 29.06.2018. godine s predstavnicima Aerodroma Sarajevo, a u vremenskom periodu od 02.05. do 07.05.2018. godine prisustvovao sam Samitu šefova policije europskih gradova koji je održan u Dublinu, Irska.

U cilju što boljeg razumijevanja i suradnje s lokalnom zajednicom dana 03.04.2018. godine održan je sastanak s gradonačelnikom Sarajeva. Lokalna zajednica je prepoznala potrebe Uprave policije za modernizacijom opreme u cilju efikasnijeg i boljeg obavljanja poslova i zadataka iz nadležnosti policije, te je dana 17.04.2018. godine Općina Novo Sarajevo donirala opremu za potrebe Treće policijske uprave, dana 18.05.2018. godine Gradska uprava je donirala motorno vozilo za potrebe Prve policijske uprave, a dana 21.05.2018. godine Općina Centar je donirala tri motorna vozila za potrebe Druge policijske uprave, dok je dana 31.05.2018. godine Općina Ilidža donirala kamere koje

su instalirane na području Pete policijske uprave.

U cilju realizacije specijalističke obuke policijskih službenika Uprave policije MUP-a Kantona Sarajevo dana 02.04.2018. godine potpisani su ugovori o suradnji s Pravnim fakultetom i Fakultetom političkih nauka Univerziteta u Sarajevu, dana 04.04.2018. godine s Fakultetom za kriminalistiku, kriminologiju i sigurnosne studije Univerziteta u Sarajevu, dana 11.05.2018. godine s Fakultetom saobraćaja i komunikacije Univerziteta u Sarajevu i Nevladinom organizacijom Prihvati šansu, te dana 14.05.2018. godine s Fakultetom sporta i tjelesnog odgoja Univerziteta u Sarajevu. Dana 28.06.2018. godine u prostorijama Pravnog fakulteta Univerziteta u Sarajevu održan je sastanak u cilju realizacije predviđene specijalističke obuke policijskih službenika Uprave policije.

Kako bi se ostvarila što bolja suradnja i komunikacija Uprave policije s drugim policijskim agencijama u BiH i F BiH, dana 09.04. i 10.04.2018. godine, u Sarajevu, i dana 26.06. i 27.06.2018. godine u Bihaću, prisustvovao sam sastancima koordinacije Federalne uprave policije i kantonalnih Uprava policije, na kojima je pored stanja sigurnosti na području F BiH, bilo govora o povećanom broju migranata na području F BiH i nenajavljenim okupljanjima građana.

U cilju poboljšanja statusa invalidnih osoba na području Kantona Sarajevo, dana 16.04.2018. godine prisustvovao sam sastanku koji je održan s premijerom Vlade Kantona Sarajevo. Dana 01.06.2018. godine, u cilju što bolje zaštite žrtava porodičnog nasilja, potpisan je Protokol o suradnji s Ministarstvom za rad, socijalna pitanja i izbjeglice Vlade Kantona Sarajevo.

U smislu što bolje suradnje s pravosudnim institucijama dana 31.05.2018. godine održan je radni sastanak s predstavnicima Vrhovnog suda F BiH.

Kako bi Uprava policije MUP-a Kantona Sarajevo što bolje odgovorila zadacima vezanim za rješavanje problema koji se javljaju zbog prisustva sve većeg broja migranata na području F BiH i Kantona Sarajevo, prisustvovao sam sastancima: dana 03.05.2018. godine s predstavnicima UN-a u BiH, dana 30.05.2018. godine u Vladi Kantona Sarajevo i dana 06.06.2018. godine s predstavnicima Državne agencije za istrage i zaštitu BiH.

Sukladno odredbama Zakona i obavezama informisanja Vlade i Skupštine Kantona Sarajevo, kao i skupštinskih komisija o stanju sigurnosti na području Kantona Sarajevo, dana 11.04. i 28.06.2018. godine prisustvovao sam sjednicama Vlade Kantona na kojima su razmatrane informacije o stanju sigurnosti za mjesec mart, april i maj 2018. godine, te period januar – mart 2018. godine, koje su i usvojene bez posebnih preporuka Vlade.

Dana 29.04., 27.04. i 21.06.2018. godine prisustvovao sam sjednici Komisije za sigurnost Skupštine Kantona, a dana 04.04., 24.04. i 25.06.2018. godine prisustvovao sam zasjedanju Skupštine Kantona Sarajevo.

Dana 06.04.2018. godine obilježen je Dan Grada i Dan policije Kantona Sarajevo.

Dana 20.06.2018. godine, u cilju preduzimanja adekvatnih mjera i radnji iz nadležnosti Uprave policije, održan je sastanak s direktorom Sarajevo film festivala.

II Neposredno ili putem Odjeljenja za odnose s javnošću redovno sam informirao javnost o radu i aktivnostima Uprave policije. U tom smislu za vremenski period april - juni 2018. godine urađeno je slijedeće:

- poslato dnevnih obavijesti pisanim i elektronskim medijima	451
- poslato saopštenja za javnost	46
- dato intervjuja za elektronske medije	29
- zaprimljeno zahtjeva pisanih i elektronskih medija	136
- održano pres konferencija	10
- gostovanje u TV i radio emisijama u studiju	14

U suradnji s Visokim sudskim i tužilačkim vijećem BiH i Federalnom upravom policije završena je realizacija kampanje Lopov uvijek bude uhvaćen, kojom su bili obuhvaćeni učenici VI razreda osnovnih škola na području Kantona Sarajevo. Organizirana je kampanja Uklanjanje grafita – Zona bez grafita, provedena pod sloganom Za čist grad Sarajevo na unaprijed određenim lokacijama. Značajan doprinos Uprava policije je dala i učešćem na različitim manifestacijama, kao što su Dječiji sajam, Sajam lova i ribolova, Auto show.

Kontinuirano se unaprjeđuje saradnja s elektronskim medijima, dnevnim i sedmičnim listovima u Bosni i Hercegovini i inostranstvu, koji su objavili veći broj vijesti i intervjuja u vezi s stanjem kriminaliteta, javnog reda i mira, sigurnosti saobraćaja, primjeni filozofije rada policije u zajednici, osiguranju javnih skupova na području Kantona Sarajevo, kao i svim drugim pitanjima iz nadležnosti Uprave policije.

Zvanični web Ministarstva je kvalitetan, redovno se ažurira, te je jedna od najposjećenijih stranica ministarstava unutrašnjih poslova u Bosni i Hercegovini i regiji. U periodu april-juni 2018. godine je, na osnovu podataka Google Analytics-a, na zvaničnom web-u Ministarstva zabilježeno 369 518 posjeta, a posjete su zabilježene iz 114 država i 2 446 gradova u svijetu. Zvanični web redovno prati i provedbe kampanje edukacije učenika i nastavnika u srednjim školama s ciljem preventivnog djelovanja i sprječavanja lažnih dojava o postavljenim eksplozivnim napravama, a koja se provodi u suradnji s Ministarstvom obrazovanja, nauke i mladih Kantona Sarajevo, kampanje “Uklanjanje grafita”, koja se odnosi na uklanjanje grafita sa zgrada na području kantona, te kampanje “Neko te voli”, čiji je cilj smanjenje broja vozača koji tokom vožnje upotrebljavaju mobilne telefone. Web također prati konutinuirano provođenje kampanje Rad policije u zajednici. Informacije i edukativni sadržaji u vezi s kampanjama i projektima Uprave policije su adekvatno predstavljeni i na službenom Twiter profilu i službenom YouTube kanalu Ministarstva. Bitno je napomenuti da je nastavljen rad na prilagođavanju svih sadržaja kreiranih i objavljenih na zvaničnom web-u u cilju omogućavanja korištenja web-a slijepim i slabovidnim osobama.

Određeni broj selektiranih informacija se objavljuje i na službenom Twiter profilu MUP-a Kantona Sarajevo. Naš Twiter nalog trenutno ima 349 registrovanih “pratilaca” i taj broj se svakodnevno povećava, a povratne informacije ukazuju na to da se na ovaj način poboljšala komunikacija s javnosti.

Dana 15.01.2018. godine aktiviran je službeni YouTube kanal Ministarstva, na kojem je do sada obrađeno i postavljeno 18 video sadržaja, i koji trenutno ima 147 “pretplatnika” i 12 505 pregleda,

uz napomenu da nisu registrovani negativni komentari na objavljene sadržaje.

**III** Statistički pokazatelji stanja kriminaliteta, javnog reda i mira i sigurnosti saobraćaja na području Kantona Sarajevo u periodu april-juni 2018. godine ukazuju da je stanje sigurnosti na području Kantona Sarajevo na većem nivou u odnosu na prethodnu godinu kada je u pitanju broj otuđenih motornih vozila, te stanje javnog reda i mira i sigurnosti saobraćaja na putevima. Broj registrovanih krivičnih djela je blago povećan, a povećanje broja registrovanih krivičnih djela se odnosi na krivična djela protiv zdravlja ljudi, što predstavlja rezultat pojačanih aktivnosti Sektora kriminalističke policije – Odjeljenja za borbu protiv zloupotrebe opojnih droga.

Iz analize statističkih pokazatelja, proizilazi da su sve do sada preduzete preventivne mjere i radnje, prvenstveno pozorno-patrolna djelatnost, rad policije u zajednici, kampanje i projekti koji se provode u okviru djelokruga rada Uprave policije, u drugom kvartalu 2018. godine provedene efikasno i da su dale jasno mjerljive rezultate.

Uprava policije će i u narednom periodu, a u skladu s Programom rada Uprave policije za 2018. godinu i akcionim planovima svojih osnovnih i unutrašnjih organizacionih jedinica, nastaviti s provođenjem efikasnih preventivnih mjera i radnji s ciljem postizanja još većeg nivoa stepena sigurnosti, kroz pozorno-patrolnu djelatnost na čitavom području kantona, kao i rad policije u zajednici, a naročito će se posvetiti pažnja planiranju konkretnih aktivnosti u cilju smanjenja broja izvršenih krivičnih djela, s posebnim akcentom na krivična djela protiv života i tijela i krivična djela protiv imovine, naročito krivična djela razbojništva, teških krađa u stambene objekte i teških krađa motornih vozila. Nastaviće se provođenje planskih aktivnosti preventivno-represivnog djelovanja na počiniocima najtežih oblika prekršaja iz oblasti Zakona o sigurnosti saobraćaja na putevima BiH, s posebnim akcentom na prekršaje koji se odnose na prekoračenje dozvoljene brzine kretanja motornih vozila i suzbijanje pojave tzv “uličnih trkača”, prolazak kroz raskršnicu kada je upaljen znak crvenog svijetla i slično, a posebna pažnja će se posvetiti i sigurnosti motociklista, biciklista i pješaka, kao učesnika u saobraćaju, s obzirom da se njihov broj, s nastupanjem lijepog vremena, svakodnevno povećava.

Tokom izvještajnog perioda Uprava policije MUP-a Kantona Sarajevo je osigurala 744 javna skupa, od kojeg broja 100 s kontradiverzionim osiguranjem, na kojima je samo u jednom slučaju došlo do narušavanja javnog reda i mira, kada su protestanti iz kategorije demobilisanih boraca, prilikom nenajavljenog okupljanja ispred objekta Parlamenta F BiH, pokušali nasilno ući u objekat, kojom prilikom je počinjeno i krivično djelo napada na službenu osobu prilikom vršenja poslova javne sigurnosti nad pripadnikom Federalne uprave policije, a koje je u potpunosti rasvijetljeno i zadokumentovano, te protiv osumnjičene osobe Kantonalnom tužilaštvu Kantona Sarajevo dostavljen izvještaj o počinjenom krivičnom djelu.

U periodu april – juni 2018. godine, u cilju podizanja stepena sigurnosti na području Kantona Sarajevo na viši nivo, izgradnje povjerenja između Uprave policije i lokalne zajednice, te poštivanja zakonitosti u radu svih policijskih službenika, preduzeo sam slijedeće:

- Na osnovu prijedloga Radne grupe donešena je Strategija razvoja Uprave policije u periodu 2018.-2021. godina.
- Dana 27.04.2018. godine svim organizacionim jednicama Uprave policije uputio sam, u cilju

- osiguranja što sigurnijeg okruženja na području kantona tokom ljetnje turističke sezone, instruktivnu depešu broj 02-17 ,
- U skladu s naprijed pomenutom depešom, kontinuirano se provodi vanredni unutrašnji nadzor u organizacionim jednicama Uprave policije,
  - Proveden je provedbeni plan kampanje “ Uklanjanje grafita”, u suradnji s ICITAP-om, Gradskom upravom i lokalnom zajednicom,
  - Prema planiranoj dinamici provodi se provedbeni plan kampanje “Neko te voli”.
  - U sklopu projekta Rad policije u zajednici, a na osnovu ostvarenih kontakata s direktorima i pedagozima osnovnih škola na području Kantona Sarajevo, u cilju stvaranja uvjeta za nesmetano i sigurno odvijanje nastavnog procesa, u drugom polugodištu školske 2017/2018. godine u školama su organizirane i provedene edukativne radionice na slijedeće teme “Djeca u saobraćaju”, “ Međuvršnjačko nasilje” i “Narkomanija”.
  - Završen je prvi dio permanentne obuke policijskih službenika od čina policajac do čina mlađi inspektor, a u skladu s Planom i programom stručnog usavršavanja policijskih službenika u 2018. godini, dok je napredna obuka za policijske službenike od čina inspektor do čina viši inspektor, u potpunosti završena. U smislu stručnog usavršavanja policijskih službenika s Fakultetom političkih nauka, Pravnim fakultetom, Fakultetom za sport i tjelesni odgoj, Fakultetom saobraćaja i komunikacija, Prirodno-matematičkim fakultetom i Fakultetom za kriminalistiku, kriminologiju i sigurnosne studije Univerziteta u Sarajevu potpisani su protokoli o razumijevanju, stručnoj suradnji i uzajamnoj podršci, te se provode aktivnosti oko organiziranja specijalističkih obuka. Također je u skladu s Planom i programom stručnog usavršavanja policijskih službenika u 2018. godine na strijelištu Suhodol održano prvo taktičko gađanje za sve policijske službenike Uprave policije MUP-a Kantona Sarajevo.
  - Preduzeo sam sve aktivnosti iz nadležnosti policijskog komesara za uspostavu sigurnosnog područja za rukovanje tajnim podacima u Ministarstvu i za opremanje prostorija za rad s djecom i maloljetnicima u skladu s Zakonom o postupanju s djecom i maloljetnicima u krivičnim postupku Federacije BiH.
  - U skladu s pozivom Ministarstva sigurnosti BiH, upućenom na osnovu poziva MUP-a Republike Hrvatske za realizaciju projekta međunarodne suradnje i podrške policijskim službenicima tokom ljetnje sezone, Uprava policije MUP-a Kantona Sarajevo je uputila dva policijska službenika, koji će tokom mjesec dana pružiti pomoć policijskim službenicima MUP-a Republike Hrvatske u izvršavanju redovnih poslova i zadataka tokom turističke sezone.

Sve konkretne aktivnosti, tokom izvještajnog perioda, preduzimao sam uvažavajući prioritete određene od strane Vlade Kantona Sarajevo, uz vrlo dobru saradnju s ministrom Mulabdić Vedranom.

**IV** U izvještajnom periodu, pored prioriteta određenih od strane Vlade Kantona Sarajevo i planskih prioriteta Uprave policije koji se odnose na efikasne preventivne mjere i radnje (pozorno-patrolna djelatnost, rad policije u zajednici, kampanje i sl.), složenije operativne aktivnosti usmjerene na rasvjetljavanje najtežih i najsloženijih krivičnih djela, akcenat sam dao na normativnu djelatnost za

koju sam ovlašten u dva oblika: donošenje propisa po osnovu izričite zakonske odredbe ili dostavljanjem ministru nacarta i prijedloga propisa ili izmjenom i dopunom propisa iz djelokruga rada Uprave policije (član 23. stav 3. tačka d) Zakona).

U gore navedenom vremenskom periodu, pored ostalog, preduzeo sam slijedeće:

- U okviru svojih nadležnosti, redovno sam učestvovao u radu Zakonodavno-pravne komisije Skupštine Kantona Sarajevo u proceduri donošenja novog Zakona o policijskim službenicima Kantona Sarajevo, Zakona o plaćama i naknadama policijskih službenika Kantona Sarajevo i izrade Zakona o izmjenama i dopunama Zakona o javnim okupljanjima Kantona Sarajevo,
- Započete su aktivnosti na sačinjavanju i potpisivanju Memoranduma o suradnji između Finansijsko – informatičke agencije i Uprave policije MUP-a Kantona Sarajevo.
- U okviru nadležnosti policijskog komesara Uprave policije, a s ciljem poboljšanja rada i blagovremenog protoka informacija, svakog mjeseca, nakon izrade informacije o stanju sigurnosti na području Kantona Sarajevo, održava se redovni Stručni kolegij Uprave policije, dok se kolegij sa šefom Ureda, načelnicima Sektora uniformisane policije, Sektora kriminalističke policije, Sektora za policijsku podršku i Jedinice za profesionalne standarde i pomoćnicima komesara Sektora za pravne, kadrovske i logističke poslove, edukaciju i analitiku i Sektora za materijalno-finansijske poslove održavaju jednom sedmično. Na svim kolegijima se razmatra stanje po oblastima rada, te iznalaze modusi za rješavanje problema koji se javljaju u radu.
- U skladu sa svojom nadležnosti učestvovao sam u radu Komisije za sigurnost Skupštine Kantona Sarajevo, koju sam redovno informirao o stanju sigurnosti na području Kantona Sarajevo i mjerama i radnjama koje će policijski službenici Uprave policije poduzimati u cilju poboljšanja iste.
- U toku su pripreme radnje na realizaciji projekta OSCE-a BiH na izradi Strategije za borbu protiv prosjačenja, a u suradnji s Ministarstvom za rad, socijalnu politiku i izbjeglice Kantona Sarajevo i Kantonalnim centrom za socijalni rad Kantona Sarajevo, čije donošenje i provedba su veoma bitni u daljem radu Uprave policije, s obzirom na činjenicu da prosjačenje zauzima najveći broj sankcionisanih prekršaja iz oblasti javnog reda i mira, kao i to da su većina sankcionisanih osoba povratnici u vršenju ovog vida prekršaja i s mjestom prebivališta izvan Kantona Sarajevo.
- U skladu s nadležnostima policijskog komesara i odredbama zakona, a na prijedlog radne grupe, dao sam prijedloge za donošenje pravilnika za provedbu Zakona o nabavljanju, držanju i nošenju oružja i municije, koji se primjenjuje na području Kantona Sarajevo.
- Nacrt izmjena i dopuna Pravilnika o unutrašnjoj organizaciji MUP-a Kantona Sarajevo u dijelu koji se odnosi na Upravu policije, sačinjen u cilju otkaljanja uočenih nedostataka i povećanja efikasnosti rada, je dostavljen ministru MUP-a Kantona Sarajevo kako bi se pokrenula zakonska procedura za izmjene i dopune Pravilnika.
- Donio sam Odluku o određivanju ovlaštenih službenih osoba za određivanje tajnosti podataka u Upravi policije MUP-a Kantona Sarajevo,
- Preduzete su aktivnosti na određivanju šifri u IS RNK i PE bazama Zakona o nabavljanju, držanju i nošenju oružja i municije i Odluke o izmjeni Odluke o prekršajima protiv javnog reda i mira Općine Stari grad,
- Postupljeno je po Zaključku Vlade Kantona Sarajevo broj 02-05-19449/18 od 19.04.2018.

godine u vezi sa Strategijom za borbu protiv korupcije Kantona Sarajevo 2018.-2019. godina i Akcionim planom za provedbu Strategije za borbu protiv korupcije Kantona Sarajevo,

- Preduzete su aktivnosti u vezi s provedbom IPA 2 Twinning projekta Jačanje provedbe zakona.
- Na osnovu izvještaja o rezultatima bezbjedonosne provjere, za četiri policijska službenika Uprave policije MUP-a Kantona Sarajevo donešena su rješenja o postojanju sigurnosnih smetnji, te su rukovodiocima organizacionih jedinica, u kojima su isti raspoređeni, i Odjeljenju za unutrašnju kontrolu date upute za postupanje u vezi navedenih izvještaja i rješenja, a u toku su postupci po žalbama koje su na rješenja o postojanju sigurnosnih smetnji dostavili policijski službenici.
- Ministru MUP-a Kantona Sarajevo upućen je zahtjev za pokretanje procedure za izmjene po hitnom postupku Zakona o policijskim službenicima Kantona Sarajevo u dijelu koji se odnosi na penzionisanje policijskih službenika i njegovo usklađivanje s Zakonom o penzijsko-invalidskom osiguranju F BiH.

V U oblasti upravnog rješavanja, redovno sam, u zakonskom roku, donosio odluke koje su, po odredbama Zakona o nabavljanju, držanju i nošenju oružja i municije i drugih propisa, u mojoj nadležnosti, odnosno nadležnosti Uprave policije.

Tokom izvještajnog perioda, ažurno, prema planiranoj i datoj dinamici, u oblasti upravnog rješavanja donosio sam odluke koje se odnose na radnopravni status svih zaposlenika Uprave policije od kojih su: policijski službenici 1444, državni službenici 16 i namještenici 163. Odluke su se najčešće odnosile na prava iz radnog odnosa, a u vezi s provedbom odredbi Pravilnika o unutrašnjoj organizaciji MUP-a Kantona Sarajevo, koji je stupio na snagu odlukom Vlade Kantona Sarajevo broj 02-05-2363-8.1/17 od 17.07.2017. godine. Navedenim Pravilnikom u Upravi policije sistematizovano je 1984 radnih mjesta, od čega 1729 policijskih službenika, 42 državna službenika, od kojih 2 rukovodioca osnovnih organizacionih jedinica i 5 rukovodilaca unutrašnjih organizacionih jedinica, te 213 namještenika, od kojih je jedan rukovodilac unutrašnje organizacione jedinice.

U izvještajnom periodu završene su procedure za unaprjeđenje policijskih službenika u čin inspektor i čin viši inspektor, te sam na prijedlog komisija za unaprjeđenje policijskih službenika, donio rješenja o dodijeljenom činu i rasporedu za 73 policijska službenika unaprjeđenih u čin inspektor i 41 policijskog službenika unaprjeđena u čin viši inspektor.

Donio sam Odluke o proceduri unaprjeđenja u čin samostali inspektor i čin mlađi inspektor, na osnovu kojih će biti raspisani Interni oglasi i procedure za unaprjeđenje.

Također je u toku procedura za unaprjeđenje policijskih službenika u čin narednik.

U periodu april – juni 2018. godine je, nakon stupanja na snagu novog Zakona o penzijsko-invalidskom osiguranju F BiH, znatno smanjen broj zahtjeva policijskih službenika za prekid radnog odnosa po osnovu ostvarivanja prava na starosnu penziju. U izvještajnom periodu nije donešeno niti jedno rješenje po osnovu sticanja prava na penziju, dok sam na osnovu tri lična



zahtjeva policijskih službenika za sporazumni prekid radnog odnosa, donio rješenja o prekidu radnog odnosa.

Donosio sam rješenja o premještanju, plaćenom odsustvu, o refundaciji troškova mobitela kao i druge akte, rješenja, odluke i uvjerenja koja se odnose na radno-pravni status uposlenika Uprave policije. Davao sam izjašnjenja na tužbe po zahtjevima nadležnih organa, a najveći broj njih odnosio se na oblasti radnopravnih i imovinskopravnih sporova.

Putem Agencije za državnu službu raspisani su javni oglasi za zapošljavanje 18 državnih službenika i 8 namještenika u Upravi policije u skladu s Pravilnikom o unutrašnjoj organizaciji MUP-a Kantona Sarajevo i Odlukom Vlade Kantona Sarajevo.

Tokom izvještajnog perioda izrečeno je 7 sankcija policijskim službenicima zbog lakših povreda radne dužnosti.

Redovno sam pratio i davao podršku radu disciplinskih tijela (disciplinska komisija i tužilac), kao i radu Odbora za žalbe javnosti Skupštine Kantona Sarajevo.

**VI** Obzirom da je borba protiv korupcije prioritet i jedan od bitnih uvjeta za ukupan rad Uprave policije kojom, u skladu s odredbama Zakona, rukovodim, dao sam akcenat na efikasnost rada svih operativnih tijela i mehanizama u ovoj oblasti, a po potrebi se i neposredno uključivao.

Sve ove aktivnosti provedene su u skladu s programskim dokumentima Vlade Kantona Sarajevo u ovoj oblasti, kao i strateških dokumenata i planova viših nivoa.

Ministarstvo, a u okviru njega i Uprava policije, je usvojilo niz strateških planskih dokumenata u oblasti borbe protiv korupcije (Strategija, Plan 2017. - 2021. i dr.).

Osigurao sam sve potrebne uvjete za rad Operativnog tima za borbu protiv korupcije, Jedinice za profesionalne standarde i nadležnog Odjeljenja u Sektoru kriminalističke policije, neposredno vršio nadzor nad radom istih i time iskazao senzibilitet i dao istinski doprinos efikasnoj borbi protiv korupcije, kao jednoj od najopasnijih i najštetnijih pojava, kako u vlastitim redovima, tako i u društvu uopće.

U izvještajnom periodu, Operativni tim za borbu protiv korupcije nije zaprimio niti jednu žalbu koja se odnosi na postojanje osnova sumnje da je počinjeno krivično djelo navedeno u Strategiji borbe protiv korupcije u MUP-u Kantona Sarajevo.

Operativni tim o svome radu, policijskom komesaru dostavlja pismeni izvještaj na mjesečnom nivou, koji se dostavlja na uvid i Nezavisnom odboru Skupštine Kantona.

Uprava policije kroz permanentnu obuku vrši kontinuiranu edukaciju policijskih službenika, kao i kroz obuku državnih službenika i namještenika u oblasti borbe protiv korupcije, a upućivanjem policijskih službenika na tematske radne sastanaka (ad hoc ili kontinuirano), specijalističku obuku, seminare i sl., vrši se dodatno osposobljavanje i specijalizacija kadrovskih potencijala u oblasti borbe protiv korupcije.

**VII** U okviru redovnih aktivnosti, shodno usvojenom Budžetu, u dijelu koji se odnosi na Upravu policije, preduzimao sam mjere i radnje na nabavci materijalno-tehničkih sredstava potrebnih za rad Uprave policije, a u cilju povećanja efikasnosti i modernizacije rada. U izvještajnom periodu, Uprava policije je, u skladu s Budžetom Uprave policije za 2018. godinu i planiranim strateškim

ulaganjima, pripremila tendersku dokumentaciju i provela tendersku proceduru za velike projekte- nabavka službenih motornih vozila, nabavka oružja za vodove za sprječavanje narušavanja javnog reda i mira u većem obimu, nabavka policijske opreme za vodove za sprječavanje narušavanja javnog reda i mira u većem obimu, nabavka kućišta za stacionarne radare, nabavka policijskih uniformi čiji je rok upotrebe istekao. Ministarstvu finansija Kantona Sarajevo dostavljen je okvirni Budžet za period 2019.-2021. godina

**VIII** Na zahtjev ministra i po ukazanoj potrebi, dostavlja sam izvještaje i informacije u skladu s Pravilnikom o redovnom izvještavanju ministra o poduzetim aktivnostima Uprave policije i o događajima i rezultatima poduzetih aktivnosti koje imaju značaj za sigurnost građana i interese Kantona Sarajevo broj 01-22/17 od 28.03.2017. godine.

Predlagao sam sastav komisija koje formira ministar.

Putem nadležnih Sektora i Odjeljenja, u skladu s odredbama Pravilnika o redovnom izvještavanju ministra o poduzetim aktivnostima Uprave policije i o događajima i rezultatima poduzetih aktivnosti koje imaju značaj za sigurnost građana i interese Kantona Sarajevo broj 01-22/17 od 28.03.2017. godine, preduzeo sam mjere na organizaciji i funkcionisanju jedinstvenog sistema izvještavanja i obrade podataka neophodnih za vršenje poslova iz nadležnosti Uprave policije. Prilikom obrade podataka postupa se po uspostavljenom sistemu zaštite osobnih podataka, kao i po dostignutom stepenu razvoja sistema zaštite tajnih podataka.

Putem nadležnog Sektora, po potrebi, i u skladu sa zakonskom procedurom raspisivao sam kantonalne potrage i oglašavao raspisane potrage.

Učestvovao sam na sastancima Koordinacije direktora Federalne uprave policije i policijskih komesara kantonalnih Ministarstava unutrašnjih poslova, i uzimao aktivno učešće i davao određene prijedloge o unapređenju saradnje između policijskih agencija na rješavanju sigurnosnih izazova i prijetnji, koji su održani dana 09. i 10.04.2018. godine u Sarajevu i 26. i 27.06.2018. godine u Bihaću, i na kojima su razmatrani izvještaji o radu za periode januar-mart i januar-maj 2018. godinu, kao i druga pitanja iz oblasti sigurnosti i uspostavi standarda jedinstvenog postupanja policijskih službenika na području Federacije, posebno kada je u pitanju prisustvo sve većeg broja migranata na području F BiH i postupanje u vezi s nenajavljenim protestnim okupljanjima građana na području F BiH.

U skladu s odredbama Instrukcije o međusobnom izvještavanju o pojavama u oblasti javne sigurnosti između Federalnog ministarstva unutrašnjih poslova i kantonalnih Ministarstava unutrašnjih poslova o pitanjima koja su od interesa za sigurnost Federacije Bosne i Hercegovine, broj 09-1608 od 26.07.2007. godine, kao i drugih propisa i procedura, ispred Uprave policije podnosio sam informacije i statističke podatke Federalnom ministarstvu unutrašnjih poslova, a naročito u vezi s poslovima iz zajedničke nadležnosti kantona i Federacije BiH, kao i poslovima iz nadležnosti Federacije, koji su povjereni Ministarstvu, odnosno Upravi policije.

Putem nadležnih Sektora u Upravi policije osiguravao sam zakoniti i profesionalan policijski

odgovor na sve događaje koji mogu imati bilo kakave implikacije na sigurnost, te i na taj način davao doprinos poboljšanju sigurnosne situacije na području Kantona Sarajevo.

**IX** Tokom izvještajnog perioda, ostvarivao sam komunikaciju i izvještavao Nezavisni odbor o rezultatima i prioritetima rada Uprave policije, te u tom smislu na raspolaganje stavio sve podatke i dokumentaciju, kako bi isti mogao preduzimati poslove i zadatke iz svoje nadležnosti. O svim događajima na području Kantona Sarajevo, a koji su interesantni s aspekta sigurnosti, Nezavisnom odboru se dostavljaju detaljne informacije.

Sjednicama Nezavisnog odbora prisustvovao sam dana 23.04. i 12.06.2018. godine, kada su razmatrane i usvojene informacije o stanju sigurnosti za mjesec februar, mart, april i maj 2018. godine i za period januar – mart 2018. godine, kao i izvještaj o radu policijskog komesara za period januar – mart 2018. godine.

Sve naprijed navedene aktivnosti, provodio sam s ciljem postizanja višeg nivoa primjene demokratskih principa i efikasnosti u radu Uprave policije, zaštite ljudskih prava i sloboda svih građana i postizanja višeg nivoa lične i imovinske sigurnosti na području Kantona Sarajevo.

Broj: 02- /18

Datum: 11.07.2018. godine

**POLICIJSKI KOMESAR**  
**Generalni inspektor policije**  
**Mevludin Halilović**

